

摘藻堂四庫全書薈要

集部

欽定四庫全書薈要

集部

元詩選初集卷三十六



詳校官候選知縣臣吳甸華

欽定四庫全書薈要卷二萬三百九十六

集部

元詩選初集卷三十六

長洲

顧嗣立

編

宋元子虛翠寒集

元字子虛舊以晞顏字行名名家于晉陵以兵
亂遷吳冒朱姓至元辛巳其父國珍領征東萬戶

案牘適病痿元丐以身代許之入海抵竹島風電
交作隨驚濤上下經高麗諸山羅沈痾瘦骨柴立
未嘗廢吟咏歲丁亥中丞王西溪舉茂才以奉親



辭子虛初侍親西江從歐陽巽齋學壯歲負氣視
富貴若不經目性畏酒處衆多漠然遇故人輒抵
掌劇談絕倒而後已自為吳逸士銘曰无生宋景
定庚申髫年幹流東西時雖搶攘而學不急乙亥
世變舊業俱廢遊方遐覽寸陰靡留谷隱巖棲莫
景將迫興忍隨時以微吟自怡得瘞骨先人冢傍
見高曾於地下幸已時子虛年八十有一至正庚
辰歲也趙子昂稱其詩風流蘊藉皆不經人道語

鄧中父云其大篇如天孫織綃雲經霧緯自出機
軸小律則日光虹彩渾然金壁穠麗縝密而不豔
含鬱靜婉而不怨其深于唐之變也馮海粟與知
最晚一見其翠寒集亟序而鋟之謂如承恩金馬
詔失意玉環詞落月今誰弔長庚夜自明雖使太
白復生亦當為子虛擊節子虛詩雅秀絕倫宜為
當時名輩所推重也他如吟嚙集一卷雜咏古人
軼事于文山疊山陸君實韓氏諸作尤有餘悲焉

鄧中父所謂議論諷刺探賾闡幽又不當徒以詩論之矣

烏夜啼

露華洗天天墮水
燭光燒雲半空紫
西施夜醉芙蓉洲
金絲玉簧咽清秋
鞞鼓鞭月行春雷
洞房花夢酣不迴
宮中夜夜啼棲烏
美人日日歌吳歎
吳王國破歌聲絕
鬼火青熒生碧血
千年壞塚耕狐兔
烏銜紙錢挂枯樹
髑髏無語滿眼泥
曾見吳王歌舞時
烏夜啼啼為誰身

前歡樂身後悲空留瑟怨傳相思烏夜啼啼別離

公無渡河

九龍爭珠戰淵底洪濤萬丈涌山起鱷魚張口奮靈齒
含沙射人毒如矢寧登高山莫涉水公無渡河公不可
止河伯娶婦蛟龍宅公無白璧獻河伯恐公身為泣珠
客公無渡河公不然憂公老命沈黃泉公沈黃泉公勿
怨天

戰城南

漢兵鏖戰城南窟雪深馬僵漢城沒凍指控絃指斷折
寒膚著鐵膚皸裂軍中七日不火食手殺降人吞熱血
漢懸千金購首級將士銜枚夜深入天愁地黑聲啾啾
鞍下髑髏相對泣偏裨背負八十創破旗裹尸橫道旁
殘卒忍死哭空城露布獨有都護名

公莫舞

公莫舞公莫舞鴻門王氣歸真主何人睚眦赤龍子手
循玉玦目相語令公莫舞公楚舞劍光射日白虹吐人

發殺機天不與撞斗帳中唉亞父霸業明朝棄如土

長門怨

金壺咽淚蓮花澀銀箭浮遲渴烏泣知更阿監羅襪冰
暝對星河玉階立內官唱漏催曉籌芙蓉夢破燕支愁
起來妝罷窺繡戶三十六院殘燭幽建章風傳鳳吹遠
翠華晨幸昭儀館瑩篋不語心自語愁長如天恨天短
紅裯暖踏楊花雪絳縷閒封守宮血鸚鵡空猜警蹕聲
春寒緊護流蘇結

枯魚過河泣

北溟有鯢歟薄崑崙氣吞積石摧禹門過河河水枯蹤
跡困泥塗垂涎向海若能濟涓滴無中流有魴鯉不貸
斗升水巨口走噉喁逆遊莫若鮪鯢兮鯢兮爾泣何由
龍伯知波雨津倒天池降水橫行隨鯢所之揚鰭為謝
魴與鯉還有桃花春漲時

王津園棄景鐘歌

炎精不靈火不德赤熛怒帝喪英魄羿弓射日日無光

黃金大鑪破金色天崩七廟移神虛鬼哭長陵一抔土
十二盤傾夜月寒漢銅仙人淚如雨六龍屈曲眠秋草
草根蟋蟀語昏曉紫苔滿地愁古春東風吹得乾坤老
蝸涎烏篆銀泥剝烏啄蒲牢戲左角更殘漏斷聲莫聞
凡雞司晨尊鐵鐸

妾薄命

雲母屏環春水鮫女織綃蟬翼輕比妾妾薄命比君君
薄情紅綿拭鏡照膽明還疑妾貌非傾城傾城從來有

人妒况復君心不如故故人心尚峰九疑新妾那能無
故時補天天高填海海深不食蓮葯不知妾心

天馬歌

天馬天上龍駒生天漢間兩目夾明月蹄削崑崙山元
氣飲沆瀣躍步超人寰天上玉帝老不騎饑食虎豹曉
出關滅沒流彗姿歛忽紫電顏黃道三十六萬里日馳
週天去復還時乎降精渥注中龍性變化終難攀天馬
來瑞何朝化為龍應童謠騶虞仁獸恥在垆龍亦絕跡

歸赤霄風沙豈無大宛種雖有八極安能超天馬來雲
霧開天廡騷裊鳴龍媒龍媒不鳴鳴鴛駘

古硯歌

神媧踏雲補天去遺下一團蒼黑天千年萬年乾不得
長帶盤古青紫煙玉工剖天天化石石內星精有餘魄
瑤光發炯成禹壁海王川后輸玄夜帝青呵霧坤倪溼
匣月不開太陰泣破天殘鉞無人補一穴絲絲漏春雨
空藏老石磨今古補天何時與天語

馮海粟云子虛烏
夜啼公無渡河戰

城南公莫舞至妾薄命古硯歌諸詩皆古錦神
林鬼塚外帶三分鳳麟洲上飛仙羽翮格力

湖上意

晚過鴛鴦浦無心唱採蓮莫嗔蘭橈急為要趁前船

甘露寺放舶至瓜洲風作

天造西來險山迴北固形斷崖纏赤日孤柱擎蒼冥此
地何能限長江或有靈然犀夜照浪飲馬曉吞星鐵鎖
沈寥廊樓船沒杳冥乾坤一衣帶吳楚兩郵亭擊楫人
人倦吹茄處處聽海門沙自白瓜步草猶青夢墮浮家

樂魂遭捩舵醒計程秋獵地問舍莫漁汀
倏忽波濤變
息忙網罟停疾飈移蚌室暗雨卷龍庭
顛顛鼃鼃壯
砢樹石腥危檣連偈仄高岸失鈴塤
世事無深測生涯
獨未寧愁煩復消釋題咏紀曾經

送鄧侍郎歸江西

光薦

中國衣冠盡孤臣蹈海迴秦思魯連操漢憶賈生才天
遠文星隱江平畫鷁催人尋芳草去雁到故鄉來山色
催行櫂波聲送客杯身還蘇武節夢泣李陵臺水落蛟

龍縮城空鼓角哀
蒼梧雲浩蕩黃屋浪崔嵬
夜雨江籬溼春風杜若開
祇令少微動慎莫應三台

李翰林墓二首

嗜酒傲明時何因賀監知
承恩金馬詔失意玉環詞
名與三閭並身將四皓期
匡山有書讀應亦歎歸遲
一騎紫鯨去空掩謝山瑩
落月今誰弔長庚夜自明
乾坤沈秀氣江水帶哀聲
天上多官府文章不可輕

長相思

昨夜相逢處朦朧春夢中
遼西書不到莫是戍遼東

次友人春別

波流雲散碧天空魚雁沈沈信不通
楊柳昏黃晚西月梨花明白夜東風
秋千庭院人初下春半園林酒正中
背倚闌干思往事畫樓魂夢可曾同

子虛律詩工絕海粟盛稱此詩中聯

高季迪評其詩謂澹蕩道逸于虞楊范揭外別樹一宗亦篤論也

答王子長

病後得書頻情知未立身
孤燈風雨夜兩處別離人
乙

鳥歸來社辛夷開過春如逢元白問莫說為詩貧

廢宅

金谷花開得幾春東風吹逐路傍塵蛙鳴私地為官地
燕認新人是故人珠履賣錢豪客散玉釵乘傳舞娥顰
獸環一鎖歌鐘斷時有鴉聲恐四鄰

春愁

金雁塵香暗鳳絃紅繩風緊閣秋千園林寂莫無鶯燕
一段春愁是杜鵑

南峰宴坐僧

空巖槁木形入定掩松扃
鵲供銜來果猿看誦罷經
雲霞埋衲重苔蘚上鞦青
只有樵人識曾因採茯苓

銅陵五松山中

樵聲聞遠林流水隔雲深
茅屋在何處桃花無路尋
身黃松上鼠頭白竹間禽
應有仙家住避秦來至今

山中書事

學道志雲霄自然塵念拋
雨寬琴上線風響樹間瓢
果

熟供猿食松高任鶴巢看他陳處士終被華山招

金陵送倪水西之江陵

楚江江上莫雲東萬里春波去意濃桃葉歌殘秣陵酒
梨花夢斷景陽鐘沅湘水落瓊瑤合巴蜀山來錦繡重
回雁峰前見歸雁相思何處再相逢

華蓋峰逸人

十步九巖壑結茅無四隣山中春雨過水上落花新採
藥逢毛女焚香對羽人時攜一瓢酒醉著去朝真

寄王子長

薄宦仍依楚長聞
傍酒壚客愁三月盡
春夢五更初吟
卷看花掩行牀
竝竹鋪江湖有佳句
知我每相於

春閨

閒畫金釵記遠人
杜鵑啼血又殘春
琵琶絃上無多字
近日相思彈不真

送僧還天目

瓶錫亂峰西
藤蘿晝掩扉
山藏翠微寺
僧向白雲歸
梵

寂風沈磬禪深雪到衣想曾行道處猿鳥共忘機

寄郴陽廖有大

遠宦身安不題書淚幾行千山萬水路一日九迴腸
鷄懷春語蘼蕪入夢香王孫歸未得歸得早還鄉

沙門島

孤嶼壓滄海風濤直下危鮫人依蜃市魚女祭龍祠
月黑犀牛鬪波紅螭螭垂登臨有奇觀感慨但言詩

牆頭杏花

紅杏西鄰樹過牆無數花相煩問春色端的屬誰家

墨梅寄因上人

夢覺霜林墮月眼明野水浮枝橫玉不吹春去斷縑閒
寫相思

萍

風波長不定浪跡在天涯莫怨身輕薄前生是柳花

山中僧

雪頂霜眉齒半稀跣趺苔石看雲歸山童掃葉鶴飛起

狼藉松花滿衲衣

唐人四馬卷四首

金銜初脫齒新齊
蹄玉無聲赤汗微
昨日杏園春宴罷
滿身紅雨帶花歸

簇仗回來玉勒閒
黃門牽向落花間
君王不愛長楊獵
嘶入春風十二閑

霜蹄踏月早朝回
尾弄紅絲拂紫苔
日暖龍池初洗罷
尚方聞進御鞍來

太僕新調試錦韉九重日色照連錢
春來興慶池邊路
偏稱宮中軟玉鞭

宮人斜

步搖明月冷無光
骨掩春泥草亦芳
豔魄不隨紅粉盡
化為蝴蝶舞昭陽

猿

巴峽聞聲愁斷腸
冷泉照影綠陰涼
藤搖亂雨領兒過
樹曬斜陽拾蝨忙
獻果去尋幽洞遠
攀蘿來撼落花香

空山月暗無人見
啼入白雲深處藏

鶴

毛骨珊珊白雪清
千年世上頂丹成
晴飛碧落秋空闊
露立瑤臺夜月明
仙島雲深歸有信
天壇花落步無聲
時來華表何人識
依舊翻身上玉京

寄題無照西園

近地棲禪室
祇園草木薰
鞦香花洞雨
衣潤石闌雲
松吹和琴雜
茶烟到樹分
遙知道林輩
來此論玄文

揚州即事

玉壘開方面金湯控上游連營驃騎宅重柝雁行樓彊
弩虛空發飛橋日夜浮煙生烽燧地草死虎狼秋此處
兵威震當時國步憂六年襄郡守三策蓋臣謀大將深
圍陷長江萬里休兩淮先按堵孤注獨橫籌破竹纔乘
勢聞風已置郵乾坤機軸轉海嶽版圖收春變山堂柳
波通汴水鷗平坡南下馬遠渡北來舟無復瓊花夢猶
餘芍藥愁塵埃何豎子還擁黑貂裘

玉環病齒圖

一點春寒入瓠犀
海棠花下獨顰眉
內厨幾日無宣喚
不問君王索荔枝

杜工部祠

老病思明主
乾坤入苦吟
秋風茅屋句
春日杜鵑心
詩史孤忠在
文星萬古沈
祇應憶李白
到海去相尋

山中

半嶺松聲樵客分
一溪春草鹿成羣
採芝人入翠微去

丹竈石壇空白雲

湘竹杖寄無住

采向舜妃江廟前
得來賈客木蘭船
老宜泉石搯慵態
吟稱煙霞倚瘦肩
宴坐夜和金錫憩
經行春卓紫苔穿
知師道價神龍護
莫謾騰空去九天

老將

殺氣消磨暗鐵衣
夜看太白劍無輝
舊時麾下誰相問
半去封侯半不歸

老馬

瘦蹄生入玉門關
病放沙場戰骨閒
歸齧殘芻應有淚
將軍頭白戍天山

老農

倩搔背痒坐深邨
愛說前朝賜帛恩
縣帖不來尋社長
自攤牛契教玄孫

老牛

草繩穿鼻繫柴扉
殘喘無人問是非
春雨一犁鞭不動

夕陽空送牧兒歸

如鏡伐竹架過牆葡萄斷竹插地復生枝葉無
住序曰瑞竹余以詩贈之

為引寒藤延晚翠試栽碧玉動秋根鳳梢依舊生虛籟
龍籜相將添遠孫林月過庭窺斷影茶煙潤色到啼痕
湯休麗藻題還徧貝葉應多此處繙

無題

花影玲瓏滿繡牀自調綠綺背紅窻惆悵佳期學絃線

七條哀怨不成雙

寄衣曲

征衣須早寄遙憶縈砧寒莫訝啼痕少相思淚已乾

贈竺鍊師

姓疑乾竺古先生霞外幽棲近四明履斗星移冠劍影
步虛風引珮環聲藥宮夜喚青鸞降花洞朝騎白鹿行
長使芝童看藥竈為耽瓊液過蓬瀛鶴傳仙語歸華表
魚寄丹書上赤城怪石醉中拈筆畫險碁靜裏按圖爭

玉桃竊慣慵留種
瑤草尋多盡識名
縮地日攜龍作杖
卧雲時約鳳吹笙
海邊定與安期遇
關上當逢尹喜迎
我本翠寒山道士
相隨便欲採黃精

贈日東僧

肄業重溟外
隨緣大夏中
錫飛鯨海靜
杯渡蜃樓空
音信千峰隔
華夸一水通
秋深故國夢
應與逝川東

江南曲

遙天碧蕩蕩
遠草綠悵悵
并作相思海
春來一樣深

蕃釐觀感瓊花

后土祠南裔坤維媿室家國封嚴典禮宮祀尚褒嘉不
是神靈異焉能眷邇應須有玉女到此賞瓊葩麗服
從空降明妝倚日斜同揮五雲扇共駐七香車月姊羞
調粉風姨罷散花青童迴絳節金母屏彤霞故事唐時
盛佳名數代誇塵根雖下界天意在中華雪讓瓏璵巧
冰銷刻鏤瑕人間惟獨爾地上更何加萬籟殊寥落羣
芳避豔邪玫瑰誠執御芍藥等泥沙聖運俄驚輟兵強

忽肆擘舛訛難核實真贗遂聲牙雷雨還驚蟄潛藏重
發芽旁枝微舊崛新葉謾榮荂尤品終蕪沒珍蕤逐水
涯兩朝成草莽九廟雜龍蛇古殿蘭旗暗殘爐桂燎賒
舜顏愁想像珠樹絕驕奢寂莫無雙譽徘徊但自嗟八
仙聊免俗消得寶闌遮

送毋丘秀才自黔中歸益州

黔南萬里地劍外去寧親蜀魄花成血山魈樹隱身竹
枝歌峽夜椰子醉蠻春歸訪王孫宅彈琴有故人

寄山中僧

名山舊隱巖巒秀精舍蕭閒殿閣虛像禮旃檀千古佛
經翻貝葉五天書獸依草座跏趺後禽下花臺施食餘
空翠溼衣橫即栗紺泉澄盃涌笑巢鷺峯夢遶雲中寺
鹿苑身棲物外居清梵夜迴松月冷孤禪晝起栢煙疎
曙鐘寒韻侵虛籟午供春香入野蕪道念有時憐老病
塵緣無計問真如遠公若許來同社陶令何妨去結廬
便向東林傍尊宿菩提從此發心初

遊三茅華陽諸洞四首

冠帶寒星帔剪霞步虛去宴玉宸家
醉歸却跨青鸞下衝落碧桃無數花

玉案清香徹夜焚紫煙成蓋覆茅君數聲金磬秋壇霽
敲碎遙天一縷雲

書滿琅函祕不開雲窓霧閣鎖青苔
門前白鹿將麋過定是避秦人引來

淡染雲霞五色衣杏壇朝罷對花披
洞中養隻千年鶴

長被仙人來借騎

杭州

錦繡波翻太液空一池寒雨落芙蓉
內前尚有中官住却聽西蕃寺裏鐘

羅噴曲

玉井荷花碧中藏偶意深綠房千萬箇
多少可憐心

淵明

心寄羲皇上生逢晉宋時風流千古意
只有杜鵑知

馬塍

桃李宮城近偏承雨露恩至今耕種地一半作花園

蘇堤

漢苑花何處唐陵栢已空相逢大堤柳令我憶蘇公

玉津園

御愛花無主長生樹幾時青青輦路草盡屬牧羊兒

景靈宮

孟月祠原廟都人憶故宮當年駕幸處喬木鳥呼風

杭州

山勢猶龍鳳行宮已劫灰北人偏悵望曾見汴京來

建業懷古

離居迫馳道晨往內西門屏營無顧問偶逢路人言昔
有六代宮今為百姓園阿閣餘故基層城但頽垣金鋪
失嚴邃玉座變荒原陳昏早墮滅隋奢亟崩奔樂極終
復悲替興相覆翻結綺徒構恨臨春工鎖冤貴嬪豔亦
無麗華皆不存高堦鳥鳥集沃壤蓬麻繁鴉如拜月魄

蝶化尋芳魂草遺舊裙色花泣新啼痕空餘龍津水流
入魚藻渾猶涵睿澤在尚感陽和恩孰知涓滴微曾悅
萬乘尊坐令芻蕘賤楔飲汙其源念彼禾黍地淒然難
具論寵深乃見辱涕下還成吞

海上自之罘至成山覽秦皇漢武遺蹟

霧氣沈坤極濤聲撼北溟雲霞五色水丹碧萬重屏脈
絡華夸秀并吞宇宙青石梁橫地戶洞構壓風霆碑碣
紛鳴鼓洧洧疾建瓴提封思霸主巡狩陟遐垌黔首何

多難皇居不少寧山驅麟避數海塞蜃遷庭鹵簿周荒
服鱗蟲畏典刑天吳驚象駕精衛泣鑿鈴浪激秦嬴怒
崖崩漢武靈空悲祖龍死但覺鮑魚腥采藥終驕妄求
仙竟杳冥惟聞傳二世無復享千齡古昔飛騰客能存
變化形解交烏兔隨定翳鳳凰翎玉檢微藏旨金丹別
有經東華司竿歷南岳攷功銘億劫開玄閔三宮護紫
局睿仁斯可冀淫暴詎堪聽謾致安期烏虛邀阿母駟
昆池波鼎沸阿閣土花零夜雨虵升樹春潮蛤上汀茂

陵迷亂草禁苑暗流螢奢侈如飄電危亡若炳星明君
當至治方士或來停火宅休生棘情河易轉萍願逢清
靜化昌運幾時丁

憶舊寄金陵馮壽之

憶昔江東日離居託孟鄰儒家見君好談席偶情親南
斗文昌近西山爽氣新驪珠驚俗眼瓊樹倚芳晨大雅
今重覩奇才豈易倫珊瑚生海網汗血出天津句滿雞
林賈名齊雁塔人傳經心入聖用筆意凝神射策應先

手藏環定後身巨流思待濟吾道詘當伸落魄傷遲邁
依棲笑隱淪三年為倦翼萬里作窮鱗伏枕思霜橘歸
溪戀紫萸鴻稀石城信魚隔太湖濱故宅閒多草空船
獨採蘋夜吟酬蟋蟀莫景歎麒麟老恐襟期斷悲懷輟
跡陳舊峰還似洛淮水想猶秦勝地登臨數殊鄉夢寐
頻潮吞李白月花動謝安春有興須相覓無聊謾自呻
休疑交契濶尚覺膽輪囷遠物那堪贈佳音欲細詢勞
歌因奉寄題罷更沾巾

詠石得天字

肢脈崑崙析胚渾混沌先靈分元島峙秀聚景雲鮮覆
壓風雷窟枝撐宇宙穿峻嶒歌篠霧歷棘聳蘿煙業業
棲危壁磷磷過瘦涓雨攻繩眼斷浪擊彈窩圓筆架珊
瑚豎屏圍瑪瑙偏骨攢癭鬼竦脊凸老蛟跽劒卓空蒼
色矛森紫翠顛醜宜鐫鳥篆剛可利龍泉怪漬潮紋溼
頑和地軸連簣蕾梢映帶薜荔葉縈磊砢蛇身縮崩
崢鳳勢旋蘚侵題字處藤絡倚節邊碎礫鋪文貝尖峰

斫黛蓮竇深膏乳滴甃潤土花沿儼若峨冠者昂如峻
士焉磴危欺木屐磯滑怯苔壇移恐嵐光動捫嗔野蔓
牽衝湍聲類磬謝瀑韻成絃硬性辭斤鑿嵌形欠畫傳
鼓歌傷莫續鼎句歎難聯砥礪誠由著磨礱學及遷畜
奇希抱璞鍊餌詫飛仙寸勢垂千仞嵬胎結幾年巖暉
知產玉峽東見奔川織女支機穩山人作枕便隕星沈
戰域敲火出漁船異或稱羊化疑應訝虎眠龜埋遺碣
下麟仆古塋前屹立中流壯平施大礎堅懷沙嗟放逐

凝魄惜嬋娟德必穹碑紀詞當巨硯研險思經濫預功
擬勒燕然嵩岱歸諸掌蓬瀛寄一拳不須填碧海直欲
補青天

答無住和太初韻見寄

寶地人來少柳陰自晚晴片雲依石潤孤磬出花清竹
筴分泉細檀煙上氍毹輕勒銘留水寺應供宿江城適楚
濤喧定歸吳雪滯行雨苔粘凍屐廊葉覆閒枰琴為蛇
紋買書因鳥跡評眼高無佛祖詩癖有山兄句妙唐風

在心空漢月明晝禪休樹影夜梵雜松聲夏減遊方興
秋添住岳情何時修白業去結嬾殘盟

上馮集賢

忠言如海膽如山趣入金門虎豹間玉筍曉班聯鷺序
紫檀春殿對龍顏氣凌百辟星辰動賦就三都造化閒
豈向長沙淹賈傅淳風會見筆追還

大都
有紫
檀殿

送陳行之之信州推官

漢守曾懸榻家聲復世綸贊廉推雅士列郡重嘉賓昭

代詳刑讞賢僚體聖仁袴襦憐故老狴犴念冤人英幹
登時望文華異等倫固宜膺寵渥豈但活罷民江左名
藩舊風流佐幕新平反須有頌剛決看如神郝鑒初榮
養黃香早締婣錦還鄉已畫綵戲室俄春自補尋山屐
誰親塾雨中拊循恩易洽煦嫗俗當淳曲動陽關疊尊
移祖帳陳未能忘手握何得更情親美爾丹青貴悲余
白髮貧尚期金鼎藥猶客素衣塵巖壑將幽賞烟霞欲
隱淪交游千古事離別百年身楚澤寒多雁吳波暖見

鱗相思不相見音問莫辭頻

寄翰苑所知

多士當文治明良際盛時
騷壇先佩印策陣已褰旗
西極蹄千里南溟翼四垂
疾雷天地破崩嶽鬼神移
學過三都賦神超七步詩
陰何須大賞鮑謝只平欺
尺璧光難掩華鐘響發遲
人遊丹桂窟鳳噦碧梧枝
漢室方虛席枚皋復擅詞
數承恩詔見趨赴重官儀
黃閣登清要蒼生息舊疲
星辰侵履舄桃李傍階墀
珂里豪家逐銅

駝樂部隨行歌金腰褭醉舞玉參差杜曲花偏滿蓬壺
酒不辭弓開射熊館劍倚化龍陂秀彥居同窠軒車出
共馳侯門相雜還寒素獨吁嘻塵榻應容下仙舟可待
追亦慚才莫逮終負志難衰攀附羞羅薦傍徨向路歧
未酬題柱興徒抱練絲悲幽谷音猶澀鹽車力尚卑泥
塗淹駟騶荊棘困黃鸝睨睨還求友騰驤却避羈愁吟
長鋏伴閒夢矮牀知縫掖今誰貴乘桴任所之短章非
善頌聊以展吾私



尋貞白先生舊居

百折歷雲嶠千花通水源寒藤垂到地怪石立當門
白壤鍊丹赤清池磨劍渾曾來誦經處片雨滴苔痕

己亥秋淮南饑客中懷故里朋遊寄之

行李依吳榜飄蓬更楚鄉山川歲云莫風雨夜何長
此地從兵革斯民復旱蝗薦飢懷賑粟久渴望攜漿
船婦爭遺穗樵童拾棄芒哭喪多藁葬征旅少羸糧
豈有災重并而無戶損傷一年租幸免衆口飯誰將
生晚羞干

祿憂時念彼蒼悲歌思請劍顏墮輒椎牀宵枕當寒溜
晨梳候曙光牧羊人戢戢放馬草荒荒木落明秋野江
空月照霜城烏頭并白水樹葉先黃羈客情難遣朋儕
興不忘投瓊花院內博塞竹林傍尚恐詩盟淺猶嗔吏
鞅妨偏提隨款段簪簪下滄浪稍遂田園計終須蘿薜
藏松筠親戚輩麋鹿弟兄行春寺尋暄暖晴波泛渺茫
清泉濯足冷紫菊染巾香醉任王侯貴閑辭禮數忙龐
公厭州府陶令樂柴桑酬答幽期愜交遊素願償短章

應得附真賞莫能量頗似岑參句多因杜甫揚流傳千載後直欲繼前唐

南峰歸雲菴

雲伴老僧居翠微老僧應共白雲飛杖藜西去雲東去日莫僧歸雲亦歸

建業閒居春思

杜曲芳菲早江城店舍煙雨青榆莢地風白柳花天愁結丁香上醒餘禁酒前病多遊冶少春事亦畱連

寄眠雲處士

聞說華陽洞人間第八天茅君旌屢降弘景駕常延地
吐黃金氣潭流碧玉泉神丹光夜發朱草葉春妍羽客
家相接麟洲脈共連山遺秦女藥鋤得漢朝錢處士懷
貞遯長生契宿緣童顏曾辟穀鶴相合成仙嘯傲三峰
上披研萬象先囊攢五行物劒握七星權石鉤青精飯
風鑪紫朮煙赤松齊遠躅玄俗並遐肩九轉功將就雙
親念復虔却攜瓊笈轉歸枕白雲眠蓊子家嘗歷壺公

設盡傳路回蓬島下杖化葛陂邊經案苔侵徧閒枰雨
滴穿池留洗瓢水壁挂斷琴絃蕙帳狷空怨蘿窓月自
懸品存容悵望澗去意潺湲局久碁多變寰清鼎又遷
衲衣期異日築室定他年季世嗟予晚幽棲志獨堅欲
隨蒲坐具已辦布行纏學道無如此遊方恐未然尚遲
甘旨奉更被苦恩牽腦慮精難滿心憂影或偏蘚壇情
願掃茶竈手能煎根究嬰兒後參同混沌前求真不易
遇師匠早哀憐

靈巖寺上方

霸業銷沈煙樹濃
吳王臺殿梵王宮
廡廊人去土花碧
香逕僧歸秋葉紅
颺母射鵞風動地
蛟精徙穴霧迷空
明朝江郭重回首
寺在翠微蒼靄中

大滌山道士

童顏幾寒暑
編葉當衣裳
琴古面無漆
柏枯身有香
樹精為老僕
石髓作乾糧
不語坐松下
天風吹髮涼

西湖酒家壁畫枯木

衡岳喬松道途遠成都古柏山川隔忽驚老樹刺眼來
疑是頽崖壓東壁拗怒風雷龍虎氣盤摺造化乾坤力
陰連滄海一片秋秀奪西湖兩峰色寒雲冉冉惹靈晝影
凍蘚緣沿借春碧醉翁睥睨欲挂衣禪伯經營思憩錫
烏鷲冥下踏枝空猿猱夜過嗔藤仄鐵榦銅柯嗅不香
蒼雪玄煙潤將滴便擬攀蘿解糾纏何煩平地生荆棘
直須掃去曲碌姿揮作昂霄數千尺

客夜思親

老妻病女去淮西
慈母居吳鶴髮衰
我獨天涯聽夜雨
寒燈三處照相思

梁隆吉遺馮筆并詩答以長句

吳剛夜入廣寒闕
生擒老兔出秋月
嫦娥泣雨蟾影孤
靈藥不春玉杵歇
桂花凝毫拔蒼綠
蜀絲纏金縷湘竹
紫蘭蕊笑春風愁
蓮花仙冠墜簪玉
松腴點漆光照眸
藤肪搗雪滑欲流
樂毅小帖排銀鈎
天馬歷塊無九州
夢中忘筆那有花
古錐畫地飛龍蛇
覺來尋錐亦無處

但見鳥跡畱平沙

二喬卷

國色雙花相並栽周郎分得小枝來漢宮早有君王見
金屋須教一處開

南岳李道士畫雙松圖

道士醉卧天柱峰睥睨石上千年之老松松精相感入
夢寐化作蒼髯雙老龍酒腸空洞生鱗角飛出兩龍醉
不覺須臾霹靂撼五岳豐隆縮手不敢捉神靈頃刻歸

虛無壁上但見雙松圖
松邪龍邪莫能詰棟梁霖雨藏
禿筆

僧日觀畫蒲萄

玉山道人蒼壁立胸膈萬斛松煤汁吐作千年古怪藤
猶帶西湖烟雨濕元氣淋漓草木活太陰菌蠢蟲蛇蟄
須繁翠霧瘦蛟走睛披玄珠黑龍泣神剗鬼刻字崛奇
水精火齊光陸離天魔擎來帝青寶鯨波涌出珊瑚枝
墨花酣春馬乳漲醉夢渴想西涼姿風牕秋疑蝨葉語

露架夜憶虬柯垂須臾掩卷何所見月落庭空無影時
喜虛碧自龍虎歸

雨中風帽別真師雲滿天壇駕鶴遲囊佩山圖行幾日
綦逢仙客看多時丹房芝朮春英長玉洞煙霞夜夢離
定有壺公遠相送瓢中添著幾篇詩

雨篷為吟友題

家分半席竝鷗眠興墮吳頭楚尾天機杼曉聲柔櫓月
簾帷暝色片帆煙魚龍窟宅同春夢雞犬圖書當夜船

咫尺五湖晴景好釣竿閒在草堂前

送金華黃晉卿之諸暨州判官

潛

夫子今衡鑑斯文屬在茲擅場年鼎盛抱業器瓌奇鸛
薦蘄頭角鷺遷奮羽儀詞源傾渤澥筆陣偃蛟螭太極
鉤深賦先儒射策辭秋闈前凌勝春榜後名馳激切波
瀾立鑄鏡物象危光芒牛斗宿標格鳳凰池袍色宮花
稱才華制草宜馬驕曾杏苑臚唱果丹墀王事勤州佐
官聯逼郡麾談經猶寶地視篆必瓜期漸覺要章寵徐

看利澤施治應黃霸最民定邵棠思郢雪聆高調郇雲
喜近披晚陪靈運履早訪董生帷梓匠寧辭斲樗材忝
辱知塵凡勞黜化傳玩指瑕疵我自哀王粲伊誰說項
斯碧山招未隱白髮病相欺歲晏空江急風迴落木悲
雨來孤枕夜夢別故人時留滯飄蓬梗攀援折桂枝願
言多善政尚得播聲詩

觀沈氏盆開雙頭蓮花戲作

一枝傾國又傾城笑並香腮百媚生湘浦二妃窺寶鏡

星宮雙六下銀泓
金波影儷嬋娟巧
玉露心分沆瀣清
曾向鴛鴦屏上看
野花空得合歡名

題玉環聯轡圖

赭袍紅映縷金衣
笑並花驄酒力微
試問六龍西幸日
有人曾侍翠華歸

答馬懷秀兄弟見訪

移家連晚歲
屏跡值春寒
舊業遺松逕
幽棲遠杏壇
數椽容膝易
五斗折腰難
有客來排闥
無人為整冠
諷詩

稱鮑照卧雪念袁安下里余誰和
高山爾自彈迎門屐齒折扶病帶圍寬
乍喜交時彥相尋到冷官鄰驚都騎盛
僕出草堂看光價連城壁風流藝苑蘭
老嗟傾蓋晚貧覺布衣單午竈添茶具
煙蓑罷釣竿傳呼聞杜曲榮耀滿江干
文雅多歆豔殷勤少接歡長鯨鉤上掣
巨闕匣中蟠筆力千鈞弩襟懷百丈瀾
籍通金馬選詔待紫泥乾樂毅曾強趙
夷吾遂霸桓貴應聯萬石功定服三韓
畱取刊彝鼎勲名未汝闌

雨夜懷虛碧

共有烟霞疾襟期江海分故人年老別寒雨夜深聞地
肺潛通嶽栽眉秀拂雲何時負笈去稽首五千文

春歸

釀蜜筒香蜂報衙杏梁泥歇燕成家浮萍斷送春歸去
盡向東流載落花

雪夜有懷

雪壓孤裘醉玉京夜聞歌吹到天明寒牕病起今頭白

始聽春蠶食葉聲

唐宮詞補遺四首

海內昇平服四夷
遠邦貢物盡珍奇
近頒手詔俱停罷
獨許南方進荔枝

罷朝輕輦駐花邊
催喚黃門住靜鞭
三十六宮人笑語
上前爭索洗兒錢

昭陽仙仗五雲中
遙聽笙簫起碧空
夜半月明人望幸
君王自在廣寒宮

宮娥隨駕蜀山迴
春日還從內苑來
聞道上皇憂寢食
御前休報海棠開

髮白解嘲

吳霜兩鬢早先秋
聞道愁多會白頭
溪上鷺絲渾似雪
想應無那一身愁

西湖所見

綠闌干護水鱗鱗
蘇小門前柳弄春
聽得語聲嬌不見
隔簾佯喚賣花人

題許山人居

葺茅棲碧巘梯路上雲危樹影池搖曲泉聲石礙遲鳥
銜丸罷藥猿拾著殘碁見說仙家伴時來覓紫芝

秣陵晚眺

天塹鴻流擁積沙石城虎踞謾雄誇山陵青草六朝地
巷陌烏衣百姓家紫蓋黃旗消王氣瓊枝璧月弔庭花
孤雲更作降幡勢目斷樓船日又斜

公子家

朱門當道擁高槐拂曉鳴騶散乳鴉紅叱撥驕矜匱西
黑崑崙黠解琵琶姬將銀蠟燒明月犬帶金鈴卧落花
不信銅駝荆棘裏百年前是五侯家

宮詞二首

月照芙蓉水殿秋仙韶一曲奏涼州高皇尚愛梨園舞

宣索當年鞠部頭

宋思陵時有菊夫人善歌舞為仙韶院第一既而稱疾告歸一日宮中曲

舞不稱旨提舉官奏曰此非菊部頭不可于是宣喚再入

條脫金寒翠袖冰羊車夢裏轆轤聲薰鑪宿得沈香火

暖却春纖暖玉笙

姑蘇臺

妖豔分明構禍胎
黃金瓌麗更危臺
笙歌夜倚東風醉
粉黛春從南國來
原草翠迷行輦跡
野花紅發舞衣灰
豪華肯信今為沼
煙水翻令後世哀

席上贈歌者

十足吳綾賞水新
一聲歌歇杏梁塵
家徒四壁門如水
那得明珠換美人

垂虹亭秋日遣興

滿袖玉皇香案煙綵霓背上俯晴川紅黃霜樹珊瑚海
黑白雲花玳瑁天玄圃空離樓十二丹墀罷對字三千
吟毫醉蘸吳江水寫與騎鯨李謫仙

初夏別業

別墅清深無俗人蛛絲窗戶網遊塵綠陰鏤日新歡夏
紅雨鑒花故惱春病去情懷逢酒惡困來天氣與茶親
壁間烏帽長閒却肯學陶家戴鹿巾

燕

銜得香泥去花間日午時玉人方睡起莫訝卷簾遲

謝僧遺石鎬

遠寄奇鎬紫玉形寒翁歡喜欲鐫銘茅峰道士傳茶設
林屋山人送水經崖瀑松風添瑟縮地鑪槐火共青熒
矮瓶未罄長鑱健且傍雲根飽茯苓

春日野步書田家

翳日惝陰翠幄遮葑園高下奕枰斜陂塘幾曲深淺水

桃李一溪紅白花
鰓尾自跳魚放子
綠頭相竝鴨眠沙
春郊景物堪圖寫
輸與烟樵雨牧家

客燕雨懷

鄴門飛雨布袍泥
遊子魂消幾夢歸
賦有聲華羞狗監
淚無氣槩笑牛衣
客愁萬斛添杯量
春瘦三分減帶圍
不似江南煙艇小
柳花如雪荻魚肥

寒食

十日花時九雨風
年年百五病愁中
春寒不禁香篝火

紅蠟青煙憶漢宮

舊內臣家老馬

罷直奚官雪滿腮
少年曾扈上之回
金砧戍削蹠多裂
玉秣辛酸齒半摧
苜蓿地閒春草遍
葡萄宮廢野花開
病嘶破櫪秋風夜
猶憶先朝校獵來

端石硯

千年品璞斬新硯
一片琳腴截紫青
雲漢帶星來玉匣
墨池蒸雨出滄溟
煙開霧斂天晶彩
海靜江澄地典刑

要與陶泓作佳傳老磨松夜寫黃庭

東風

東風吹綠上汀洲染出江南一片愁長到春來問芳草
不知何地可忘憂

無題效李商隱

妝淺顰深凭綺疏小郎新拜執金吾絃中言語分明怨
袖上腰肢準擬扶翠履鴛寒慵鬪草紅牙馬暖罷撈菰
無人商略心頭事潛向花間卜紫姑

旱鄉田父言

疲牛病喘餓桑間碌碡閒眠麥地乾殘稅驅將兒子去
豆畦却倩草人看

雙陸

金縷紋桑斲局堅紅雲倒浸一池蓮星環紫極無多點
月印銀潢有兩弦行采砧聲鳴素練計籌花片落牙錢
箇人慣受卑棲苦長為歸遲罰綺筵

春病起即事

壯懷玉具劒空攜老去金門獻賦遲服藥身軀多病日
養花天氣半陰時愁鄉塵積瑤琴嶽夢境寒生翠被池
春事幾何公事急可憐蝴蝶挂蛛絲

許山人家

桐君種藥隱蘅皋竹祖生孫共養高茶脚碧雲凝午椀
酒聲紅雨滴春槽休糧貌古添清瘦餌朮身輕長綠毛
仙詔未頒遲拔宅家資猶戀一溪桃

書趙集賢詩翰後

九天宮闕鬱嵯峨公昔騎龍上大羅文在玉堂多煥爛
淚經銅狄一滂沱原陵永黍悲艷鎬人物風流繼永和
今日吳牋拜遺墨只堪哀怨不堪歌

漢宮

武帝昇霞玉殿空金人夜泣月明中三千嬪御無行幸
猶費丹砂飼守宮

答無功歲莫見寄

豆楷灰動擁鑪天品字煨殘楮拙煙詩草病多刪枕上

眼花書久廢燈前老依蕭寺僧留宿相對蒲團夜不眠
筋力漸衰餘習在夢中去趁暗門船
翠寒集馮海粟序作于延祐庚申時
子虛年已六十餘矣此詩領聯云云當是其莫年手自
編定者其吟嚙集小引稱至元丙子中載葉李趙孟頫
事當是後至元所作而鯨背吟序曰
至元辛卯則前至元也為附記于此

吟嚙集詩

王蠋

全齊拱手受燕兵義士誰為國重輕七十二城皆北面
一時發憤獨書生

甘羅

函谷關中富列侯黃童亦僭上卿謀此時園綺猶年少
甘隱商山到白頭

曹瞞

姦雄睥睨鼎終移葉舍譙東志竟齋若使人生盡如意
墓門應表漢征西

魏武故事載操令有不
能如意徵為都尉之語

綠珠

紅粉捐軀為主家明珠一斛委泥沙年年金谷園中燕

銜取香泥葬落花

李三郎

獨跨青驪棧閣間
華清休憶夜鳴鑾
空教萬馬盤旋舞
不濟崎嶇蜀道難

徐佐卿

化作遼東羽翼迴
適逢沙苑獵弦開
寧知萬里青城客

直待他年箭主來

明皇獵于沙苑見孤鶴回翔一發而中有青城道士徐佐卿者謂院中人

曰吾行山中為飛矢所及尋已無恙此箭非人間所有他年箭主當來宜付之後明皇幸蜀遊明月觀見箭驚

異佐卿蓋中
箭孤鶴耳

張建封妾盼盼

妾未成灰鬢已霜
曉紅十載唾茸窗
香魂若作樓中燕
一世孤飛不肖雙

李國主

春花秋月滿雕闌
便到江南亦夢間
近日何嘗事湯沐

只將清淚洗朱顏

後主歸朝後與金陵舊宮人書
云此中日夕只以眼淚洗面

王介甫

投老歸耕白下田青苗猶未罷民錢半山春色多桃李
無奈花飛怨杜鵑

西湖

故都日日望迴鑾錦繡湖山醉裏看戀著銷金鍋子暖

龍沙忘了兩宮寒

孫何帥錢塘柳永作望海潮詞贈之
流播金國金主亮聞三秋桂子十里

荷花遂起投鞭渡江之心時人詩云誰把杭州曲子謳
荷香十里桂三秋那知卉木無情物牽動長江萬里愁
南渡駐蹕留連為歌舞
之場遂忘中原悲夫

秦少游女

郎罷藤陰老淚潛黃金誰贖蔡姬還看來山抹微雲恨

直送蛾眉出漢關

靖康間有女子為金軍所掠自稱秦學士女道中題詩云眼前雖有還鄉

路馬上曾無放
我情讀者悽然

岳武穆王

尅復神州指掌間永昌陵側詔師還丹心一片棲霞月
猶照中原萬里山

陸君實

六鰲海上失乘輿天柱臣難隻手扶應有二妃魂尚在

至今何處望蒼梧

君實名秀夫淮安人

賈瓊妻韓氏

國破家亡泣血吟千年不與妾同沈中流定有當時淚

滴作江聲哭到今

巴陵女子韓氏希孟魏公五世孫嫁為賈尚書子瓊婦岳州破被虜之明

日以衣帛書詩自投于江而死詩傳人間哀國亡身虜也末曰借此清江水葬我全首領皇天如有知定作血面請願魂化精衛填海使成嶺長興州判官沈某託親戚劉光履求吳興趙子昂書此詩傳世光履諾而未言一夕夢一婦人云趣為我求書庶因大人君子之筆發揚幽憤趙聞而異之乃為寫一通歸之子昂所序如此

寶劍謠

以下翠寒集補遺

鐵精蒼玉龍景潛萬丈虹孤電走白日老冰立秋空提
出天地愁八極來清風未逢隆準帝古匣塵土蒙大蛇
當道兮苦斷秋蓬嗚呼寶劍兮亦將遇乎英雄

題龔翠巖中山出游圖

鄧都山黑陰雨秋羣鬼聚哭寒啾啾老尪豐髯古幞頭
耳聞鬼聲饒涎流鬼奴輿尪夜出游兩牆劍笠逐輿後
槁形蓬首枯骸瘦妹也黥面被裳繡老尪回觀四目闕
料亦不嫌尪醜陋後驅鬼雌荷衾枕想尪倦行欲安寢

挑壺抱甕寒凜凜母乃榨鬼作酒飲令我能言口為噤
執縛魍魎血洒髀母乃剝鬼作鬼鯁令我有手不能把
神閒意定元是假始信吟翁筆揮洒翠巖道人心事平
胡為識此鬼物情看來下筆衆鬼驚詩成應聞鬼泣聲
至今卷上陰風生老馮氏族何處人託言唐宮曾見身
當時身色相沈淪阿瞞夢寐何曾真宮妖已殘馬嵬塵
倏忽青天飛霹靂千妖萬怪遭誅擊鄴都山摧見白日
老馮忍飢無鬼喫冷落人間守門壁

題鄭所南推蓬竹卷

要寫秋光寫不成
愁凝苦竹淡煙橫
葉間尚有湘妃淚
滴作江南夜雨聲

月上人還西湖

南峯歸度夏舊業在煙霏
半夜聞清磬一燈明翠微雲
蘿尋寺遠猿狖見人稀
想到經行處天花繞錫飛

商人婦

日日湖頭望望夫
夫未回無情春水恨
祇送別船來

琵琶

一片相思木聲含古塞秋琵琶是誰製長撥別離愁

鯨背吟

并序

僕粗涉詩書薄遊山水偶託迹于胄科未忘情于
筆硯緣木求魚乘桴浮海觀千艘之漕餉勢若龍
驤受半載之奔波名如蝸角碧漢迢遙一似浮槎
于天上銀濤洶湧幾番戰慄於船中今將所歷海
洋山島與夫風物所聞舟航所見各成詩一首詩

尾聯以古句蓋滑稽也非敢稱于格律然而風檣
之下柁樓之上舉酒酌月亦可與梢人黃帽郎同
發一笑云爾至元辛卯中秋蘇臺吟人朱晞顏名
世序

按翠寒集趙魏公序謂子虛舊以晞顏字行世居晉陵家值兵難遷吳冒朱姓云則知晞

顏即子虛無疑也曹石倉十二代詩選別載朱晞顏鯨背吟正子虛從事征東幕府時所作石倉蓋

未知晞顏子虛之為一人耳

梢水

拔矧張蓬豈暫停為貪薄利故輕生幾宵風雨船頭坐

不脫蓑衣卧月明

鷺遊山

崖倚波濤頂接空黃鷺遊處樹成叢莫言山上人希住
多少樓臺烟雨中

日出

金烏搖上浪如堆萬象分明海色開遙望扶桑岸頭近
小舟撐出柳陰來

東洋

東溟雲氣接蓬萊徐福樓船此際開應是秦皇望消息
采芝何處未歸來

揆沙

萬乘龍驤一葉輕逆風寸步不能行如今閣在沙灘上
野渡無人舟自橫

海鷗

羣飛獨宿水中央逐浪隨波羽半傷莫去西湖花裏睡
芰荷翻雨打鴛鴦

乳島

遠望渾如兩乳同
近前方信兩高峰
端相不似雞頭肉
莫遣三郎解抹胸

沙門島

積沙成島浸蒼空
古祀龍妃石崦東
亦有遊人記曾到
去年今日此門中

萊州洋

萊州洋內浪頻高
砥鐵千尋繫不牢
傳與海神休恣意

二三升水作波濤

水程

九日灘頭不可移
九灘一日尚嫌遲
何須頻問程多少
路上行人口是碑

尋踪

萬艦同踪在海心
一時相離不知音
夜來欲問平安信
明月蘆花何處尋

拋釘

千斤鐵釘繫船頭萬丈灘中得挽留想見夜深拋擲處
驚魚錯認月沈鉤

出火

前船去速後艖忙暗裏尋艖認火光何處笙歌歸棹晚
高燒銀燭照紅妝

落蓬

潮信蓬留風力慳落蓬少歇浪中間殷勤為向梢人道
又得浮生半日閒

走風

夜颶顛狂浪卷天深淵多少走風船一宵行盡波濤險
只在蘆花淺水邊

櫓歌

浪靜船遲共一艚櫓聲齊起響音連空要將檀板輕輕和
又被風吹別調中

大浪

吞天高浪雪成堆搖蕩驚心眼怕開深謝波神費工力

幾回風雨送將來

撰淺

撰水行船逐步尋
忽逢沙淺便驚心
蓬萊近處更難徧
揚子江頭浪最深

討水

海波鹹苦帶流沙
島上清泉味最佳
莫笑行人不風韻
一瓶春水自煎茶

討柴

海樹年深成大材一時斧伐作薪來山人指點長松說
盡是劉郎去後栽

直沽

直沽風月可消愁標格燕山第一樓細問花名何處出
揚州十里小紅樓

自題

乘興風波萬里遊清如王子泛扁舟早知鯨背推敲險
悔不來時只跨牛



元詩選初集卷三十六

總校官候補中書臣吳紹潔
校對官編修臣馬啟泰

謄錄監生臣汪詞垣

欽定四庫全書薈要

集部

元詩選初集卷三十八

七

詳校官候選知縣臣吳甸華



欽定四庫全書蒼要卷二萬三百九十七

集部

元詩選初集卷三十七

長洲

顧嗣立

編

陳旅安雅堂集



旅字衆仲興化莆田人幼孤篤志於學以薦為閩海儒學官御史中丞馬祖常一見奇之謂曰子館閣器也胡留滯於此因勉遊京師侍講學士虞集見所為文慨然歎曰此所謂我老將休付子斯文者矣即延至館中朝夕相講習與祖常交口延譽

於諸公間平章趙世延力薦之除國子助教三年
考滿諸生不忍其去請再任焉出為江浙儒學提
舉召應奉翰林文字至正元年遷國子監丞又二
年卒年五十六有安雅堂集十四卷史稱其文典
雅峻潔必求合於古作者不徒以徇世好而已河
東張翥序其集曰天歷至順間學士虞公以文章
擅四方學者仰之其許與君特厚君亦得與相薰
濡而法度加密虞之獎成後進陳之識所依歸才

名接踵相得益彰昔人風致真不可及也

謝徵君松巢

昔聞徵君在天目松間結巢成久留南榮北郭井里近
西枝東柯邨谷幽蕙帳眠深翠露落石泉釀熟緗花浮
擬借丹梯到高處枳勾桐乳非吾求

友人記余少作因錄之

溪邨積水生寒煙書廬睡起清明天隔溪莫哭人飯鬼
塍間燒錢野風起酒旗山前雨疎疎來禽花低飛鷓鴣

荒墳累累出新草草長如人人又老東門大道青楊間
可憐車馬無時間

次韻毘陵吳寅夫見寄

季子江海居勝友園池賞臨水咏新詩輕颺送流響丹
花陽林吐綺翼幽竹上雲瀾阻塵躅離思徒浩漭杪秋
辭京邑寒郭艤吳榜宗兄念行役旨酒勞鞅掌承子共
清棕論文發豪爽我貧久僑棲所至類樂廣願得陽羨
田寧慚五湖長夙昔詒約言遲莫嬰世網衆仙諒超遙

樓觀滿方丈餘霞散文席斜月生翠幌芳夕令人思思
之不能往晨興即高岡引睇寫孤想

次韻陳景忠見寄

用世已無伎高人方據梧詞林忝供奉客舍候徵呼拓
落需微祿騫騰失壯圖為文下枚孺力穡後孫愉春草
生湖曲暮雲飛屋隅論交尊有螳憶別履非鳬擬汎鷁
夷舸重遊泰伯都山泉斟雪乳石薜淪瓊酥作鱸溪庖
近聽猿野磴紆松風吹綠鬢花雨落紅綸佳什勤相贈

幽期媿獨踰煩君語宗長為我謝寅夫

為蕭元泰題龍虎山巖圖

龍虎之山仙所寰我昔夢寐遊其間乾坤風氣結沖秀
中有正一玄都壇羽人授我九節杖林磴窈窕窮幽攀
金宮藥殿起寥廓翠崖丹巘深迴環峰頭時飄白菡萏
石上盡種青琅玕諸巖一覽二十四總似瀛渚蓬萊山
清溪浮空引雪練遠岫隔水來煙鬟就中仙巖更奇絕
上有玉樹皆檀欒虹光半夜出林杪云是石室韜神丹

欲求刀圭已衰疾羽人去我如飛翰褰裳礪曲采芳草
斷猿疎雨春山寒覺來俗事日滿眼歲月冉冉隨驚湍
會稽蕭氏忽相訪笑以此圖令我看夢中羽人貌真似
而我別後鬢毛斑題詩聊復紀疇昔願拂塵服齊驂鸞

湖上分韻得春字

君子佩明信相期湖水濱時欣宿雨霽畫舸送遊人輕
鷗集蘭渚佳樹變鸞晨山遠煙容淡日出水光新美人
含麗思豔曲歌陽春睽攜會彌歡酣適趣益真茲遊敦

德誼況乃及芳辰

題秋山圖

之子託沖隱秋山樓觀深矧茲及霜晨遐矚沈氛陰翠
巘含白雲丹楓映青林靈谿鳴石溜野屋負層岑趨喧
事多違即曠恒恆心何哉芳月宴而我阻幽尋

次韻許左丞從車駕遊承天護聖寺是日由參
政陞左丞

銀甕呈山麓

地名甕山

鑿輿際水鄉離宮疑馭娑行殿仿飛

翔細浪魚鱗襲輕颺鷁首驟扶桑明遠岸析木度高檣
屏翳時清蹕豐隆夙啓行衛兵環越棘舞女蹋吳航漸
覺仙樓近微聞梵鐸揚石壇登案行瓊佩雜璆鏘夕者
休蘭櫂春壺瀉桂漿伊蒲頒內供簷蔔散林香罷宴蜺
旌動開帆獸錦張弄田低碧樹馳道出金塘畿甸嚴車
輔臣鄰重室廂方欣麟在極復喜鳳鳴陽聖主需賢急
嘉猷賴弼良從容承顧問烏奕拜恩光文采堪華國芳
菲正滿堂協忠成泰治流澤遍遐荒援古言應切匡時

慮更長誰哉疲土木況乃象為廊

安福李氏臨溪亭

結屋負南郭清溪流屋前端居塵事少水木自幽妍
硯弄寒泚鳴琴寫潺湲沙鳥時近人汀雲相往還烹
鮮
笔溪毛留客坐前軒逝川道體著觀物悟微言

題米元暉溧陽溪山圖

宿雨散曾巘林麓翳煙霏遙山斷復連川上初昕微
我
昔困行役漂蕩秋未歸幽子喬松流解后啓郊扉撫景

正若此別離嗟願違覽卷遂終日溪雲欲生衣

題天台桃源圖

天台一溪綠周遭溪南溪北都種桃東風吹花開復落
遊人不來春水高錢塘道士張彥輔畫圖送得劉郎去
昨夜神鵲海上來洞裏胡麻欲成樹

蘇伯修往上京王君實以高麗笠贈之且有詩
伯修徵和章因述往歲追從之悰與今茲睽攜
之歎云耳

往年飲馬灤河秋灤水斜抱石城流青城丈人來水上

揭謝蘇王

曼碩敬德
伯修君實

皆與遊顧予濫倚橋門席日斜去

坐鰲峰石夜涼共飲明月尊醉眠更聽高樓笛灤河九

曲流賤賤自我不見今三年蘇郎又扈屬車去佇望弗

及心茫然龍門峽中雲氣濕山雨定灑高麗笠別意遙

憐柳色深歸心莫為鷓鴣聲急

龍門道中夏
月多杜鵑

不才未許收

詞垣賦成何日奏甘泉人言凡骨難變化為我致意青

城仙

旅時已注為史
官復勒留助教

題胡氏殺虎圖

沙河野黑秋風麤
棗陽戍卒車載孥
道旁老虎夕未餬
車中健婦不見夫
倉皇下車持虎足
呼兒授刀割其腹
夫骨已斷不可續
泣與孤兒餐虎肉

小混沌

魚復浦中石方
氏得之加今名

大園縣鷓含清澤
儵忽多事中央死
玄精散作萬星縈
天椽不堪參墮趾
日化七十皇有虺
蜀雷難苴絢材委
殺妖壺涿驚弗燬
剡剡靈光照寒汜
老龍乘磧用師紀

俾作魚麗陣中士風雲往來江落水虎臂難回玉生子
緇文素肌溫栗理方叔得之驚且喜羃蒙錯綺鏞髹篚
閉門乍觀戒貪褫嗚呼混沌乃若此吾終乞之還汝始

謝氏祖孫創澧陽橋

涔陽極目雲氣昏衝風揚波鼉窟翻相妃抱琴望虞舜
日莫江竹多嘯痕木蘭為舟不可渡誰幻曾淵作平路
天橫夜靜牛渚長海市朝晴蜃樓吐祖孫移山山可移
昔人不信今見之千年猶有召伯埭白面聚斂嗟何為

海谷

歸墟谷在渤海東八紘之水注其中不盈不縮浩無際
吞吐日月含空濛靈鼇於此負山出上有縹緲金銀宮
人間相去幾萬里弱水滿眼多迴風琴高來時踏赤鯉
少君歸去乘白鴻秦皇到老不得渡嗟我欲往將焉從
子房有孫海谷子告我有路非難通只隨雲氣相上下
與子共謁扶桑公

分題得車搖搖送方叔高之官

車搖搖薊門路高麗驕馬不受鞭方郎得官上車去薊
門南頭盧水流燕姬十五居酒樓彈箏唱歌折楊柳落
日車前勸郎酒南陌行人往復來幾人似郎得官回郎
車莫驅傷馬足車中本載連城玉車搖搖鄔子洲賣車
買船載旗鼓晴湖風輕聞櫂謳

題蒙泉吏隱圖

世皇昔日收雲南鯨鯢伾伾手所戡烏蒙烏撒腹心地
不有軍府誰其監漢廷遣將非充國累歲屯田無善績

兵驕民獷土不畚國帑空曾糜萬億大名劉侯文武才
承詔萬里誅蒿萊豪蠻盡戢戎壘立竄卒復還農畝開
有泉遠出蒙山下日夜清冰鳴石罅渠分澮決來縱橫
土脈浮膏作秋稼府中侍積多如山陂池種魚無曠乾
已聞舂磴響林際仍為菰蔬流圃間劉侯暇日遊泉上
賓吏追從意沖暢步隨涼影傍高松坐看晴雲起孤嶂
朱轡奕奕來甌閩喪車遄返黃河津雲南戰骨橫四野
布穀聲中荒草春劉侯雖死應愁絕吟魂空咽泉頭月

祇今寧謚重謀帥九原人去無歸轍荔支臺館開尊時
劇談每及西南陞淒涼遺像畫圖裏對此流涕將奚為

哭陳元麒

阿麒能讀書八歲貢京國翱翔公卿間聲譽頗籍籍我
家越山南汝家越山北及我官橋門見汝長五尺翩翩
丹穴雛五采作毛翮崑崙上瑤樹上有實可食汝胡不
此留而去不可即乃翁攜汝來為汝頭盡白辛苦攜骨
歸江離黯愁夕可憐東門吳任達乃彊釋

陳新甫生日出紅玉盃飲為賦

崑崙東阿含海日石中王子如日赤神工夜發昆吾刀
剗作金杯盛酒喫蟠桃初開縵母家丹露滴如芙蓉花
廣陵公子酒如海年年顏色觀朝霞

題陳氏瀟湘八景圖

軒后不張樂白月照野水泠泠水影中瑤瑟泣湘鬼
洞庭

秋月

西崦生夕霏歸僧度林巘但覺山路長不覺鐘聲遠
煙寺

晚鐘

百貨集亥市莫搖偏買鹽山日出未高翠雨溼酒帘

山

晴巒

倦翮久欲下涼風起湖北官客多挾弓莫近白沙驛

平沙

落雁

落日楚江深倒影在高樹曬網茅屋頭分魚石梁步

漁邨

夕照

南浦草仍碧高樓日易斜歸帆傍水廟簫鼓下神鴉

遠浦

帆歸

江氣行雲莫忽失巴陵樹一夕洞庭波都向篷上注

湘蕭

夜雨

寒雲不成雨暝色凝江楓巫峽梨花夢飄浮過郢中

江天

莫雪

題虞先生詞後

憶昔奎章學士家夜吹瓊瑤泛春霞先生歸卧江南雨
誰為掀簾看杏花

題班婕妤題扇圖

層城柘館重徘徊坐見瑤階長綠苔
紈扇秋來定無用
君王方築避風臺

題畫梅

處士橋邊古岸隈梅花偏向小園開
衝寒有客尋春去
移得晴窓雪影來

題雨竹

江上鷗鴟留客住黃陵廟下泊船時
一林春雨垂垂綠

消得晴風爛熳吹

為張壺洲賦壺洲

握日臺高雨氣收，扶桑涼影動瀛洲。
珠林錯落三華露，寶稼離羅五色秋。
鄰曲夜機鮫有室，空中煙市蜃為樓。
頗聞雲錦張高士，曾與壺公汗漫遊。

送張真人代祠武當龍虎兩山追賦

桂館祠官持羽節，名山兩地躡丹梯。
共誇曼倩來金馬，大勝王褒祀碧雞。
杵澗暝痕消雨石，杼巖秋影動星溪。

蕙肴椒醑登瑤席定有神光起時畦

題畫圖二首

青紅樓觀護煙霞湖曲高亭竹逕斜日出炎埃生九野
松陰水石養苔花

雨餘空翠轉霏霏杜若洲邊小艇歸又為故人臨野閣
江雲日暮溼秋衣

題泛舟圖

江雲生白石水木澹幽姿雙松出叢薄翠色集遙枝落

日明極浦楚岫正參差美人鼓蘭枻歲晏將何之

開玄堂下有兩鴈互浴盆池王真人命工繪為

圖

玉塵山前紫鴈飛真人燕坐久忘機餘不溪水連天碧
只借盆池浣羽衣

次韻本元上人相別

君向雷峰塔邊住詩成總在倚闌時蘇堤殘柳凝煙小
葛鵑閒雲度水遲衲子定回花遶屋故人別後草生墀

相知不似相忘好誰說莊周與惠施

次韻韓伯清訪句曲外史

茗雪歸來俗事稀偶然攜客款郊扉
渚霞落盃松花熟溪雨登垞石菌肥
薄宦不閑慙折簡高人相見定披衣
平生願究中黃祕安得茅君指化機

題扇面

剪紙為梅花殘
月夾以素紈

娟娟翠袖倚清空解把并刀剪雪風
一段寒香吹不盡西泠殘月角聲中

題段氏扇子

上有一枝
著色竹子

江上竹枝歌為君顰兩蛾秋風團扇底零落黛痕多

題馬道士畫

江上羣山翠作堆人家門檻對江開小樓應有憑闌者
天遠歸帆似不來

題水仙花圖

莫信陳王賦洛神凌波那得更生塵水香露影空清處
留得當年解珮人

題遼人射獵圖

美人貂帽玉驄馬誰其從之臂鷹者沙寒草白天雨霜
落日馳獵遼城下塞南健婦方把鋤丈夫邊戍官索租
用吳彥暉韻送揚州張教授還汴梁二首

花邊細馬蹋輕塵柳外移舟水滿津莫向東風動歸興
杭人半是汴東人

息息歸去緣何事要看揚州芍藥花定有金盤承絳露
送他梁苑故人家

題竹石圖

藍田水曲青玉立
雨過秋光滿林溼
故人結屋傍幽崖
靜愛石窻晴翠入

題高氏所藏畫圖

誰家林麓近溪灣
高樹扶疎出石間
落葉盡隨溪雨去
只留秋色滿空山

題畫蘭

九畹光風轉重巖
墜露香紫宮祠太乙
瑤席薦瓊芳

艾氏心遠樓

聞子臨川上高樓萬里并興來時獨立心與目俱行野
夕歸鴻小溪晴落木明登臨何日共作賦寫平生

送李盤中真人代祀江南三名山

弱水回風不受帆三山只在大江南使槎真帶秋星溼
仙掌遙分夕露甘琮玉禮神通景氣寶香隨地結晴嵐
泰壇建論昭靈貺老我猶能效史談

方壺道士作荒山白雲圖寄豫章楊顯民

之子讀書處亂山生白雲林花晴冉冉巖瀑暝紛紛畫
此何為者持之以贈君謂宜作春雨舒卷只成文

次陸天錫韻

燕南幕府文章客澤國相逢讌集齊酒後鱸魚霜作鱠
花邊驄馬月為題千篇傑句諧金奏一曲離歌聽玉噓
別後寒雲滿江海鴈書何處落青泥

題韓伯清所藏郭天錫畫

往年京口郭天錫學得房山高使君畫省歸來人事少

煙岑閒向客樓分
林扃暝落青楓雨
水郭寒生白蜃雲
歲晚懷人增感慨
晴窓展玩到斜曛

南山詩

山在龍虎山南張宗師藏劍舄之地曰丹丘有小有洞門玉津澗月橋天鑑池

金沙井躍泉漱雲亭山雲閣丹桂鵲桃花源云

江左羣山囿仙丘
倚太霞上清分亢爽
南谷抱谿訝臺觀
黃瓊宅林巒赤虎家
天池開寶鑑日井射
金沙桂實秋巖栗
桃烘曉岸葩泉香通
美竹雲液嫩靈芽
俯澗松偏潤緣崖逕
自斜幽亭宜水繞
晴閣受嵐遮神舄丹扃

秘玄關紫氣賒石橋留月色銀浦渺皇華願解延陵劍
終乘博望槎臨風一解后食我棗如瓜

題羅節婦傳後

羅氏之夫貶海上有強
之為妻者遂自經死

歲晚良人去未歸堂前有客著新衣此身只為韓馮死
化作鴛鴦海上飛

送潘澤民還江南詩

并序

攜李潘澤民往歲來京師貴人有好事者延致材
館且太尉薦之而澤民悵焉有庭闈之思遂薦為

行中書從事欲有以悅其親耳夫懷才抱藝之士
莫不欲自見於宰物之地而徘徊淹遲無所遇合
至於窮不能歸羞見其親戚鄉黨者豈少也哉若
澤民之歸亦可以飲酒而歌舞矣雖然明時將廣
碣石之宮拓康莊之第以徠天下之賢雋而登用
之澤民宜無久留於外也乃為之賦詩曰

之子來京國侯門即曳裾只求毛義檄未獻賈生書野
樹山前合江帆雨外疎故人正相望且莫賦閒居

林外詩為夏生作

幽人遯世入林間
林外高風況可攀
仲御偶然遊洛水
黃公豈必在商山
春深溪雨流花出
日暮松雲載鶴還
拓落塵中嗟我老
歸歟無地可投閒

仲御黃公
皆夏氏也

題城市山林圖

城市山林路不分
畫橋騎馬是徵君
樹頭粉堞連青嶂
陌上紅塵亂白雲
水巷柳深鶯喚友
陽坡草暖鹿為羣
滑稽誰似東方朔
更向金門避世氛

題耿氏所藏豔畫

五月風生水殿涼
綠楊深處奏鴛鴦
佳人偏愛臨池坐
欲與荷花鬪晚妝

送朱蓮峰著書得官南歸

城東有客過吾廬
揮麈高談逸氣舒
金馬豈無方朔伎
石渠今取夏侯書
沙隄老屋秋楓合
海浦歸帆暮雨疎
我亦草玄官拓落
江南無地可耕鋤

題黃鸝海棠圖

二月園池蜀錦殷多情宮鳥喜來看上林春色濃於酒
莫把黃金鑄彈丸

題春宮倦繡兩圖二首

上陽宮樹奏鶯簧蛺蝶羅衣逗暖香睡思已隨巫峽雨
綵絲偏與日爭長

綠樹垂垂護寶闌牀頭翠帕幕雙鸞阿鬟可是無情思
又見春風到牡丹

梅石

浦江趙用章宋故家也集
賢完號之為梅石處士

還家不復羨浮榮處士頭銜字字清
媿我獨無歸隱地上林春晚更聽鶯

吳王納涼圖

吳王臺榭滿汀洲湖上風來暑雨收
坐擁紅妝可娛老市無赤米不教愁
采蓮舟載煙岑晚響屨廊通水殿幽
歲莫甬東寧有此夜涼歌舞莫令休

和維揚友人

揚子江頭水拍天人家種柳住江邊
吳娃蕩槳潮生浦

楚客吹簫月滿船
錦纜憶曾遊此地
瓊花開不似當年
竹西池館多紅藥
日夜題詩舞袖前

此詩一作
馬祖常

題黃筌竹鸞圖

竹有
寔

一窻晴色綠猗猗
羣雀飛來占好枝
此竹幾年方結實
空山秋晚鳳雛飢

次韻友人京華即事二首

阿閣稜層幕曉陰
扶桑涼影映疎林
燕山北擁天都大
瀛海中涵月殿深
仙女乘鸞吹紫玉
才人騎馬勒黃金

壯游偶結高陽客無復臨風動越吟

落拓練衣閨苑間江南遊子醉長安禁溝春過留香雨
宮樹風來響翠瀾五衛旌旗秋甸裏千官劔珮曉雲端
何人只獻河清頌宜向明時瀝寸丹

題趙叔隆倦繡圖

龍綃碧幙挂秋水藕風吹香團扇底琵琶彈歇宮書長
釵落雲邊九雛紫二妹誰是薛靈芸繡得金塘兩鴛似

一作人去繡窓春共倚

宮奴夕殿喚更衣

一作夢回涼館催功裏

露溼銀牀

響桐子

為趙敬叔賦漢海獸蒲桃鏡蓋鄭夾漈家故物
也

尚方老冶收精銅金膏玉水開腫朧未央曉月低青桐
六宮秋井生芙蓉當塗妖鬼負神器銅人登車數行淚
寶奩偶落長安市永與人間照珠翠凝陰空祭江心龍
海雨夜入閩王宮一朝愁殺祭上翁破屋日夜穿晴虹
西苑野露堪作酒中有駒駝活欲走趙侯得之莫失手

龍女鮫童俟之久

此鏡得于夾祭
之孫鄭子經

郭孝子詩

金臺有孝子郭氏名壽瑛壽瑛執親喪晝夜聞哭聲負
土起崇塚栽松翳玄扃瘦骨寒岳立苦淚春河傾視容
日梅梅一朝廢雙睛復扶大母柩冥行出蕪城願言畢
序葬身瘞心則寧里人問孝子過毀聖所懲孝子哭且
咎我非敢傷生有淚不哭親惡乎用吾情親死我目在
徒能視無形黃泉相見日無用此目明吾聞壽瑛語悲

劇不自勝昔人曾有言五色令目盲長年悅紛華看斧
戕心精視彼郭孝子媿色能無頽而我嗜讀書昏花散
秋燈思親不能哭涕泗空填膺

題趙氏人馬圖

蒲桃宮前白面馬春日賜與近臣歸主人愛馬不換妾
更與小奴裁綠衣

次韻阿容參政省中夜坐

上都

上國羣公集秋深畫省開虛簷河影近涼苑樹聲來獨

坐多幽趣高吟有逸才平明當獻納騎馬踏輕埃

院中聞大駕先還再和伯修韻

甘泉宴罷雁聲寒桂樹吹香出寶闌翠輦遙臨秋海白
霓旌高拂曙星殘壇城家拜銀麈賜棘院人爭繡虎看
堪笑子雲能作賦獨騎羸馬後奚官

三馬圖

豹股龍膺百戰餘凌煙長樞載璫璫時平不出橫門道
願為君王駕鼓車

送海豐劉巡檢

隨牒遊丹徼春風騎氣舒
蜚丁鳴鼓吹魚吏掌文書
浦嶼煙霞遠邨墟瘴癘除
石華肥可茹無用膾蝼蛄

贈萊州石工

落星猶帶天河溼絕勝丹丘鬼
血腥琢作大尊休載酒
萊山柏露照人青

汾州北席里石氏節婦

北里高樓晝掩扉水銅光冷上苔衣
寸心誓比南山石

汾水秋風鴈不飛

賦凝春小隱

康里公宅
花陰也

一窻花氣襲人衣
窻底芳塵煖不飛
坐久硯池生石雨
海棠枝上雪都晞

送王致道代祠北岳北海濟瀆南鎮

皇帝齋明守鎮圭
祠官奉節出金闥
北尋海瀆瞻恒岳
南涉江淮上會稽
山下靈風吹桂櫂
雲邊仙樹拂丹梯
王褒空有甘泉頌
投老還鄉祀碧雞

送項鍊師還天台

鍊師
能醫

不學東方朔歸尋馬子微
人間無藥賣海上有雲飛
谷暖金鷺大溪深土鴨肥
當年種桃種高過石樓扉

送毛真人南還

真人不似壺丘子老去都忘杜德機
太乙象文令虎守尚方鳬舄背人飛
巖扉煖翠侵絳帙江渚晴霞上羽衣
游子故園春似海客窻長日聽催歸

春日思遠遊

春日思遠遊遠遊欲何止
角哀見楚王伯桃樹中死
出門逢路人天下無二子
春山一萬重春江一萬里
上有無心雲下有無情水

次韻荅都下友人二首

百金買駿馬千金買紅妝
長安畫樓上飲酒吹笙簧
天園中桃鬱鬱陌上桑
美人越山下白髮生雕房
涼風振高梧繁露集幽菊
攬衣起徘徊殘月照我屋
曾襟鬱孤清日日塵眯目
銀河在天上手短不可掬

元宵懷錢塘

武帝親祠太乙神，流光洵旭動星辰。
行宮典禮猶存漢，軹道山河已易秦。
香逕至今嗟木客，露盤無復泣金人。
紅燈幾點東風裏，猶是元宵一度春。

此詩誤入
僑吳集

和康庸田魯瞻公言懷韻

震澤三江入堰豬，今年春雨又生魚。
漢廷數有寬租詔，魯史元無告糴書。
溝洫已非神禹迹，東西空引白公渠。
袖中夙有匡衡疏，也擬金門候屬車。

江城即事

江城十日九風雨，騎馬出門行紫苔。
春草綠時猶作客，雲山多處忽登臺。
青青野竹題詩去，小小吳姬喚酒來。
漠漠候車乘早發，城東昨夜杏花開。

題木齋卷

昔年種樹不勝巢，老幹今如屋脊高。
屢許狙公分橡栗，時呼木客醉松醪。
衣巾白日霑蒼雪，枕簟西風夢海濤。
歲晚淹留吾倦矣，借君叢桂續離騷。

桃花幽禽圖

金塘花竹豔春紅
枝上幽禽弄暖風
莫把殘英都蹴盡
無情流水畫橋東

題熊雲巢竹石圖

道人種竹三千个
定有新巢宿鳳皇
石上幽香飄露粉
簷間新綠裊風篁
天壇月白瑤笙近
水國春寒翠袖長
見說故人東海上
釣竿日莫倚扶桑

送李彥方副使入閩

在奎章閣纂修
經世大典方畢

海邦赤子窮無告詔遣儒臣著繡衣天祿閣中書灝灝
越王山下馬駢駢魚風滿港榕陰合燕雨侵簾荔子肥
一道澄清俄頃事使星還向紫垣飛

建昌胡氏小有樓

窈窕麻姑宅登臨憶謝公近聞好山色都在小樓中屋
曙丹霞吐城深翠雨通石池正當戶人立藕花風

題子昂江天釣艇圖

雨餘秋水滿山前正是江南落鴈天何處故人魚艇小

亂蟬疎樹夕陽邊

申屠子迪為山南憲掾白部使者毀夷陵曹操
廟

黃牛峽口灘聲急楚女傳芭水廟秋此地殷勤祠魏武
何人辛苦得荊州莫令故國無遺祀不見中郎盡發丘
千載有人伸大義高風全似故安侯

送趙子期使交趾

曉日承恩紫殿深都門祖道馬駸駸上書不奏唐蒙策

歸橐寧將陸賈金
露入珠盤鮫室白
苔生銅柱象崖陰
為君臨水歌黃鵠
天北天南萬里心

為彭道士賦鶴峰

在信州城南

跨鶴臺高倚翠微
昔人城郭是邪非
蕊珠宮觀秋如水
有客吹笙月下歸

題張氏風竹圖

湘江風卷白頭波
北渚雲深帝子過
欲采瓊芳渡江去
翠衫輕薄曉寒多

清章黃氏北墅

聞說黃家墅開門入翠嵐
細岑依舍北流水出城南
雨暖蘭抽筍霜晴樹落柑
千年讀書地更莫乞羊曇

壽吳宗師

晚號看雲道人

九朝冠珮泰階平
國有儒仙作上卿
碧海宵晴迎日出
黃庭春暖看雲生
竹間自洗金鸞蕊
花外長留翠鳳旌
莫學華陽貞白老
乞身神武聽吹笙

送余嘉賓赴常寧州判官

家在洞庭左舟行湘水間湍流多度竹石聳不依山野
郭看花出州田載稻還舊聞官事少幽興轉相關

送楊田甫巡檢之官潮陽

與君相識三十載解后都門白髮生南海珠明飛別鶴
上林花煖轉新鶯蜚丁浦口迎官艦瘴母雲頭避使旌
自是昇平游宦樂不教龍吏惱吟情

程氏竹雨山房

江南春盡雨泔泔繞舍篴簫含積陰園曲疏泉石苔滑

籬根繫船溪漲深山寒翡翠巢密葉日暮鷓鴣啼遠林
此時世慮淡於水聯牀燈火百年心

西山詩 并序

至順三年六月之吉西山新寺之穹碑樹焉是日
百僚無敢不至碑所余與趙博士繼清早作出平
則門沿大隄並駐蹕亭下轉入湖曲逢趙宗吉成
漢卿二編修與劉敬先典籍騎驢從蒼頭挈匏尊
邀余與繼清就隄側藉草坐灌木延陰風冷然生

澗底幽鳥鳴其上命蒼頭隄傍取荷為盤以實腊
肉倒尊中濁醪飲數行甕山流黛與湖影相盪潏
於盃盤巾被之上余在京師七年蓋未有一適如
此時也酒盡三君子起曰子於此能無詩乎余言
歸即賦之及歸以職事縻繞少清趣明年三月宗
吉持紙來索詩戶外雪深二尺無他客乃賦詩曰
蓐食出西郭初日明遠川聯鑣走山麓山樹盡含烟紫
石擁馳道綠水侵弄田高人湖上來解后野澗邊茂柳

垂密幄曾莎布柔羶回風颭幽爽有鳥聲清圓采荷薦
珍腴洗琰行芳泉芙蓉濯新雨迴立方嬋娟晤言攄素
抱逸思慕遐騫窈窕紺園夕珠林映璇淵黃金作臺殿
縹緲集諸天顧慙凡躅汙亟去不敢遑適意無先期重
尋有中悵華月忽易改賞心與時遷晨興望雲物皓雪
滿層顛

題雲林晚晴圖

故人別後江波綠神女歸來峽雨乾海上日花春冉冉

天邊雲樹曉團團
滿汀芳草留孤艇
度石幽泉咽下灘
最愛東頭小亭子
聽鶯何日一憑闌

陪趙公子遊蔣山即席次李五峰韻

甲戌十月一日也

弭櫂丹陽郭
鳴鞭白下山
晴原煙翳翳
幽樹鳥關關
石液玻璃碧
雲根瑪瑙殷
佛巖開細菊
僧逕入叢菅
雨洗川容淨
潮隨野色還
六朝有遺事
盡在夕陽間

陸氏菊逸

望仙橋下市廛間
汨汨紅塵沒馬鞍
誰種禽花滿幽徑

故收野色入晴闌
籬根荷鍤培深雨
鄰曲移杯對早寒
玩此芳叢足怡老
南山當戶不曾看

送鄧文質

薊門風雪貂裘敝
寒索能多季子金
萬里壯遊孤硯在
十年歸夢亂山深
春來草色生南浦
日暖鶯聲滿上林
空濶庭前看流水
浮榮何足累初心

白晝看圖

隋家宮妓掃長蛾
銷盡波斯百斛螺
化作雪禽春樹頂

遠山無數奈愁何

送葉天根南還

我識天根子于今二十年吹簫來翠嶺鼓枻入丹淵日出扶桑底雲生建木巔人間方夜半海上得春先老我江湖迴微官歲月遷荒泉流竹里冷雨浸芝田髮短何為者君歸重惘然飛霞浮夕景定在石林邊

郊居

郊居息塵事日夕望青山青山秋氣多白雲出其間露

渚野芳集楓林江色寒夷猶感流序況乃曠幽攀

吳宗師赤城阻雨次甘泉韻

三十六盤嘯杜鵑杜鵑嘯盡到平川千山白雨作秋氣
六月赤城堪晝眠銀渚星槎留使客竹宮風帳候神仙
衰予病起橋門下目送晴雲度楚天

送宜黃劉縣尹

寶劍妝成即遠遊郎心何似妾心憂茜裙香溼芙蓉雨
翠袖涼生薜荔秋江北長愁寧滯酒周南多病莫登樓

海門潮落江瑤美能把千金買越舟

與陳敬初同舟北遊題餞行卷後

我愛天台陳敬初少日辭家即遠圖上書擬獻賈生策
入關便棄終軍繻八月官河秋水大三江親舍暮雲孤
名成歸去歲未晚卜鄰有約依東吳

秋山行客圖

雨餘空翠曉濛濛有客騎驢落木中滿目好山行不盡
溪猿啼斷石楠風

題楊氏所藏畫圖

山光濃淡雨初晴
曲曲江清樹色明
若買草堂江上住
盡開窻戶看雲生

縉溪道士

縉雲溪上縉雲山
春水流出桃花灣
白頭道士鶴為馬
月明騎過居庸關

送鄭子經遊霞城

子經與我真弟兄
海風十二吹青苹
桐花影裏忽相見

美人為奏青樓笙酒酣氣盛欲飛起謂可戾契圖功名
樓前雪惡鴈欲墮寶鞭笑指丹霞城人生聚散亦何有
歲月與子相崢嶸金臺有約不可爽春船擬破滹沱冰
和蕭秀才歌風臺

歌風臺前野水長王媪賣酒茅屋涼酒邊父老說劉季
頭戴竹冠歸故鄉山河霸氣已消歇颯颯老柳吹斜陽
臺前小兒更擊筑筑聲更似三侯章

東歸歌送鄭子經

北風吹山蕉葉黃長亭野日寒荒荒驅車送子歸故鄉
人生此處堪斷腸舊遊回首秋山下醉帽簪花同走馬
歡娛如此離別何華月芳年不堪把子今去矣來何時
翠壺雲深那可知向來亦有燕山期子今去矣來何時

三筍吟

并序

子經家藏三筍圖予作三筍吟以志之

蜀妓推繭如截肪鮫工夜織青犀裳翰林待詔擅花竹
硯屏春透宮雲香鑱根薦鮮玉生汗南風入林翠胎綻

牙根冤血點點紅三鳳聲沈九秋晏太官金錡陳淳熬
看圖未必值爾曹饒夫煮簣政未熟見此豪奪君其弢
張書巢畫圖

萬里青城叟歸尋江上山瀑喧春雨過汀暗暮雲還駐
馬白沙曲裏人綠樹間薊門有巢父幽興最相關

秋荷圖

持衣寄所思欲寄不得遠水國風露涼徘徊九秋晚

明妃出塞圖

昭君北嫁呼韓國巫山更有昭君村黃金鏤鞍玉驄馬
分明載得巫山雲涼風吹動釵頭燕一曲琵琶寫幽怨
沙草遙連雞鹿塞野花不種鴛鴦殿內家日日選娉婷
淚痕滿袖空多情漢廷自此恩信重美人身比鴻毛輕

崇碧軒詩

并序

江西張繼明歸進賢山中屋前後皆高嶺前嶺曰
瀑全蓋謂飛瀑若塵全然門臨清溪溪受飛瀑張
氏有田如干畝溪行田間後嶺旁有溪谷多古木

屋東為軒四楹豫章松竹雜樹與山俱青因名軒
曰崇碧奎章學士虞公為大書之繼明又來錢塘
求詩于予詩曰

豫章山中多豫章長松大竹相扶將屋東微見紅日動
簷曲細含翠雨涼洗空絲瀑落溪艇暖客錦苔鋪石牀
何時到子軒下坐太朴顯民同瓦觴

危太朴楊顯民皆繼明之所厚而其

居又相近也

先天觀

山中有田百畝有石泉曰丹鼎澗中有石如船

龍虎山南古澗阿幽人住處白雲多千林總種三珠樹
百畝曾收五色禾丹鼎夜光迎海日石船秋影接天河
環中異趣知誰會我欲窮源過碧蘿

送王君實御史西臺

除書朝下五雲間閣吏新移玉荀班恰恰黃鸝鳴苑樹
遲遲驄馬過鄉關濯纓長樂宮前水拄笏終南雨後山
不羨相如文侶錦到官三日詠詩還

張將軍廟堂詩

將軍燕人大德五年征
西南夸陣亡時年七十

將軍頭白更征蠻
平宋吳鉤血尚殷
萬斛樓船上江去
半空鐵馬哨雲還
淒涼部曲清茄畔
窈窕祠堂綠樹間
堪笑班超真老矣
乞身生入玉門關

元詩選初集卷三十七